

Yakub dan Keluarganya Pergi ke Mesir

Petikan dari Kitab Taurat: [Kejadian 46:1-34](#).



¹Yakub mengemaskan segala kepunyaannya lalu berangkat. Apabila dia sampai di Bersyeba dia mempersembahkan korban kepada Allah yang disembah oleh Ishak, bapanya. ²Pada waktu malam, dalam suatu penglihatan, Allah berfirman kepadanya, “Yakub, Yakub!”

“Ya, aku mendengar,” jawabnya.

³Allah berfirman, “Aku Allah, Allah yang disembah bapamu. Jangan takut pergi ke Mesir. Aku akan menjadikan keturunanmu bangsa yang besar di sana. ⁴Aku akan menyertai engkau ke Mesir, dan membawa keturunanmu kembali ke negeri ini. Yusuf akan berada di sampingmu apabila engkau meninggal.”

⁵Kemudian Yakub berangkat dari Bersyeba. Anak-anak lelakinya menaikkan bapa serta anak isteri mereka ke atas pedati-pedati yang dikirimkan oleh raja Mesir.

⁶Mereka juga membawa ternakan dan segala harta benda yang diperoleh mereka di Kanaan, lalu berangkat ke Mesir. Yakub membawa semua keturunannya, iaitu

⁷semua anak cucunya, lelaki dan perempuan.

⁸Inilah anggota keluarga Yakub yang pergi bersama dengan dia ke Mesir: ⁹Ruben, anak lelaki yang sulung dan anak-anak lelakinya: Henokh, Palu, Hezron, dan Karmi.

¹⁰Simeon dan anak-anak lelakinya: Yemuel, Yamin, Ohad, Yakhin, Zohar, dan juga

Syaul, anak lelaki daripada seorang perempuan Kanaan. ¹¹Lewi dan anak-anak lelakinya: Gerson, Kehat, dan Merari. ¹²Yehuda dan anak-anak lelakinya: Syela, Peres,

dan Zerah, tetapi anak lelaki Yehuda yang lain, Er dan Onan sudah meninggal di

Kanaan. Anak-anak lelaki Peres ialah Hezron dan Hamul. ¹³Isakhar dan anak-anak

lelakinya: Tola, Pua, Yasyub, dan Simron. ¹⁴Zebulon dan anak-anak lelakinya: Sered,

Elon, dan Yahleel. ¹⁵Mereka semua ialah anak yang dilahirkan oleh Lea bagi Yakub di Mesopotamia, selain anak perempuannya, Dina. Semua keturunan Yakub daripada isterinya Lea berjumlah tiga puluh tiga orang.

¹⁶Gad dan anak-anak lelaki: Zifyon, Hagi, Syuni, Ezbon, Eri, Arodi, dan Areli.

¹⁷Asyer dan anak-anak lelaki: Yimna, Yiswa, Yiswi, Beria, dan Serah, saudara perempuan mereka. Anak-anak lelaki Beria ialah Heber dan Malkiel. ¹⁸Enam belas orang itu ialah keturunan Yakub dan Zilpa, hamba perempuan yang diberikan Laban kepada Lea, anak perempuannya.

¹⁹Rahel, isteri Yakub mempunyai dua orang anak lelaki, Yusuf dan Benyamin. ²⁰Di Mesir Yusuf dan isterinya Asnat, mempunyai dua orang anak lelaki, Manasye dan Efraim. Bapa Asnat ialah Potifera, imam di Heliopolis. ²¹Benyamin dan anak-anak lelaki: Bela, Bekher, Asybel, Gera, Naaman, Ehi, Ros, Mupim, Hupim, dan Ared. ²²Empat belas orang itu keturunan Yakub dan isterinya Rahel.

²³Dan serta anak lelaki Husyim. ²⁴Naftali dan anak-anak lelaki: Yahzeel, Guni, Yezer, dan Syilem. ²⁵Tujuh orang itu ialah keturunan Yakub daripada Bilha, hamba perempuan yang diberikan oleh Laban kepada Rahel, anak perempuannya.

²⁶Keturunan Yakub yang pergi ke Mesir semuanya berjumlah enam puluh enam orang, tidak termasuk menantu perempuannya. ²⁷Dua orang anak lelaki Yusuf yang dilahirkan di Mesir menjadikan jumlah bilangan keluarga Yakub yang berada di Mesir sebanyak tujuh puluh orang.

Yakub dan Keluarganya di Mesir

²⁸Yakub menyuruh Yehuda pergi lebih dahulu untuk memanggil Yusuf supaya menemui mereka di Gosyen. Apabila mereka sampai di Gosyen, ²⁹Yusuf menaiki kereta kudanya untuk berjumpa dengan bapanya di situ. Ketika mereka berjumpa, Yusuf memeluk bapanya dan menangis lama sekali. ³⁰Yakub berkata kepada Yusuf, "Sekarang aku rela mati setelah melihat engkau dan tahu bahawa engkau masih hidup."

³¹Oleh itu Yusuf berkata kepada saudara-saudaranya dan sanak saudaranya yang lain, "Aku harus pergi dan memberitahu raja bahawa saudara-saudaraku dan semua sanak saudaraku yang tinggal di Kanaan sudah datang. ³²Aku akan katakan bahawa kamu gembala domba dan lembu, dan sudah membawa ternakan serta segala kepunyaan kamu. ³³Jika raja memanggil kamu dan bertanya tentang kerja kamu, ³⁴katakanlah kepada baginda bahawa kamu ini gembala ternakan sejak kecil, sama seperti nenek moyang kamu. Dengan demikian raja akan menyuruh kamu tinggal di daerah Gosyen." Yusuf mengatakan hal itu kerana orang Mesir berasa hina untuk bergaul dengan gembala ternakan.